



Broj: 04/2-50-1-16-8-1/05
Sarajevo, 29. april 2005.

ZAPISNIK
s osme sjednice Zajedničke komisije za evropske integracije

Sjednica je održana 27. aprila 2005. sa početkom u 14.00.

Sjednici su prisustvovali: Fatima Leho, Vinko Radovanović, Filip Andrić, Selim Bešliagić, Halid Genjac, Mehmed Suljkanović i Milorad Živković.

Odsutni su bili Ilija Filipović, Nenad Mišić, Hilmo Neimarlija, zbog učešća na zasjedanju Parlamentarne skupštine Vijeća Evrope, i Branko Zrno i Boško Šiljegović, zbog učešća na sjednici Komisije za reformu odbrane.

Gđa Fatima Leho, predsjedavajuća Komisije, predložila je sljedeći

DNEVNI RED:

1. Izvještaj sa Konferencije predsjedavajućih komisija za vanjske poslove i evropske integracije zemalja SEECP, Bukurešt, 24. – 25. mart 2005.
2. Sedmi međuparlamentarni sastanak sa Delegacijom Evropskog parlamenta za Jugoistočnu Evropu, Brisel, 23. – 24. maj 2005: prijedlozi za dnevni red, prijedlozi za zajedničku izjavu, pripreme za teme
3. Konferencija komisija za evropske integracije zemalja učesnica u Procesu stabilizacije i pridruživanja, Sarajevo, 16. – 18. juni 2005: dnevni red i program
4. Razno

Dnevni red je jednoglasno usvojen.

Ad. 1. Izvještaj sa Konferencije predsjedavajućih komisija za vanjske poslove i evropske integracije zemalja SEECP, Bukurešt, 24. – 25. mart 2005.

Komisija je usvojila prethodno dostavljeni Izvještaj sa Konferencije predsjedavajućih komisija za vanjske poslove i evropske integracije zemalja SEECP, održane u Bukureštu 24. i 25. marta 2005. Članovi Parlamenta Rumunije izrazili su spremnost da pomognu Parlamentarnoj skupštini Bosne i Hercegovine u procesu evropskih integracija tako što bi sa PS BiH podijelili dosadašnja iskustva Rumunije u tom procesu. Za vrijeme Konferencije gđa Leho je razgovarala sa predsjedavajućima komisija za evropske integracije Albanije, Hrvatske, Makedonije i Srbije i Crne Gore o inicijativi Bosne i Hercegovine da se u Sarajevu održi Konferencija komisija za evropske integracije zemalja učesnica u Procesu stabilizacije i pridruživanja. Dogovoreno je da se Konferencija održi od 16. do 18. juna 2005.

Ad. 2. Sedmi međuparlamentarni sastanak sa Delegacijom Evropskog parlamenta za Jugoistočnu Evropu, Brisel, 23. – 24. maj 2005: prijedlozi za dnevni red, prijedlozi za zajedničku izjavu, pripreme za teme

Komisiji je dostavljen nacrt dnevnog reda Sastanka, koji je predložila Delegacija Evropskog parlamenta. Komisija je donijela odluku da na Sedmom međuparlamentarnom sastanku u Briselu učestvuje delegacija Komisije u sastavu: Fatima Leho, Vinko Radovanović, Filip Andrić, Ilija Filipović, Mehmed Suljkanović i Boško Šiljegović. Ova delegacija će održati sastanak na kojem će se dogovoriti o pripremi za teme. Dogovoreno je da članovi Komisije svoje prijedloge tema za dnevni red Sedmog međuparlamentarnog sastanka i prijedloge za zajedničku izjavu dostave sekretaru Komisije kako bi ih prosljedio Delegaciji Evropskog parlamenta.

Odlučeno je i da na sljedećem sastanku, kolokviju ili konferenciji za koju Evropski parlament uputi poziv učestvujaju Milorad Živković i Halid Genjac.

Ad. 3. Konferencija komisija za evropske integracije zemalja učesnica u Procesu stabilizacije i pridruživanja, Sarajevo, 16. – 18. juni 2005: dnevni red i program

Gđa Leho je govorila o razlozima za ovu inicijativu i za održavanje Konferencije. Jedna od preporuka Solunske agende je jačanje regionalne saradnje između parlamentarnih komisija za evropske integracije zemalja učesnica u Procesu stabilizacije i pridruživanja, između ostalog, u vidu formiranja tijela sličnog COSAC-u (Konferencija komisija za evropske poslove i poslove Zajednice parlamenta Evropske unije). Nakon toga postoji mogućnost apliciranja takvog tijela za specijalni status u COSAC-u.

Gđa Leho je predstavila Komisiji prijedlog dnevnog reda i programa Konferencije, sačinjen na osnovu razgovora sa komisijama Albanije, Hrvatske, Makedonije i Srbije i Crne Gore i sa Direkcijom za evropske integracije BiH.

Predložene su tri teme: prijedlog i usvajanje poslovnika Konferencije, kao budućeg tijela za saradnju komisija za evropske integracije, iskustva zemalja učesnica u Procesu stabilizacije i pridruživanja u dosadašnjem procesu približavanja Evropskoj uniji i usklađivanja zakona s *acquis communautaire*, i programi pomoći Evropske unije zemljama učesnicama u Procesu stabilizacije i pridruživanja.

Komisija je prihvatila predložene teme za dnevni red i predloženi program Konferencije.

Gđa Leho je istakla da je potreban dogovor Komisije o tome koji članovi Komisije će pripremiti uvodna izlaganja o pojedinim temama. U vezi s prijedlogom poslovnika Konferencije, sekretar Komisije je pripremio prevod Poslovnika COSAC-a, koji će pomoći da Komisija pripremi prijedlog poslovnika Konferencije. Dogovoreno je da g. Filipović, g. Ćeman i g. Živković rade na pripremi prijedloga poslovnika. G. Suljkanović će pripremiti izlaganje o temi iskustva u dosadašnjem procesu približavanja Evropskoj uniji, a g. Radovanović o temi programi pomoći Evropske unije. Prethodno će od Direkcije za evropske integracije biti zatražene informacije potrebne za pripremu ovih tema.

Ad. 4. Razno

Za tačku 4. nije bilo prijedloga tema za diskusiju, te je gđa Leho zaključila sjednicu.

Zapisnik sačinila
Sena Bajraktarević

Fatima Leho,
predsjedavajuća Zajedničke komisije
za evropske integracije

